

金

華

徵

獻

略

金華徵獻畧卷之十二

鶴潭王崇炳虎文氏撰錄

門人黃廷元殿選較訂

東湖金律孔時編梓

文學傳三

朱震亨

〔元〕朱震亨字彥修義烏人臨海太守汎之後環則其大父也震亨生秉殊資讀書卽了大義爲聲律之文刻燭而成尙俠氣不肯出人下一觸怒卽求直有司鄉之右族搖手莫敢犯旣而聞許謙承紫陽四傳之

學講道東陽八華山中。執贄往事。時年已三十六矣。謙爲開明天命人心之秘。內聖外王之道。由是心局融廓。體膚如覺增長。潛驗默察。必欲見諸實踐。抑其粗豪。歸於平粹。如是者數年。歲當賓興。再試再不利。曰得失有命。苟推一家之政。以達於鄉。寧非仕乎。廼卽其家適意亭遺址。建祠堂。考朱子家禮損益之。歲時敬祭。不愆於儀。會下包銀之令。州縣承之一里之間。不下數十姓。震亨所居里。僅上富岷二人。郡守召震亨臨之以威。曰此非常法。君獨不愛頭乎。震亨笑曰官頭貴。固當惜。民頭何愛焉。此害將毒子孫。必欲

及民願倍輸吾產當之守雖怒竟不能屈鄉有蜀墅
塘羸堤壞而水竭數以旱告震亨倡民興築置坊庸
鑿爲三竇時其淺深畜洩之震亨壯齡時以母病脾
乃習醫徧訪名人卒得劉守真之學於羅知悌遂精
其術一時方嶽重臣及廉訪使者聞其名莫不願見
莫不欲交章薦之皆力辭惟民瘼吏弊必再三蹙額
告之或府縣吏決獄當罪而情可原宥必從容言之
多所全活震亨爲人孤高如鶴挺然不羣雙目有大
小輪日出乃見雖毅然之色不可凌犯而清明坦夷
不事表襮精神充滿接物和粹人皆樂而親之語言

有精魄。使人聳聽。有蹶然興起之意。而於天人感應。殃慶類至之說。尤反覆不厭。其學則稽諸載籍。一以躬行爲本。其爲文則以理爲宗。居室服御。敦尚儉樸。藜羹糗飯。安之若素。惟喜聞人之善。隨聞卽錄。用爲世勸。晚年識見尤卓。其所著書。有宋論一卷。格致餘論若干卷。局方發揮若干卷。傷寒論辨若干卷。外科精要發揮若干卷。本草衍義補遺若干卷。風水問答若干卷。辟風水凡七種。卒年七十八。學者稱丹溪先生。論曰。婺書列丹溪於方技。而義烏志則列理學。考之元史。則列文學。元史載白宋潛溪。所聞不如所

見故仍載文學、而叙其醫法於弟子戴元禮傳甲云、

金涓

金涓字德源、自幼警敏、日記數千言、比長大肆力於經傳、聞許謙承考亭之緒、講道八華山中、乃執經從遊、厲志力學、卒爲入室弟子、又嘗學於黃潛與宋濂、王禕、朱廉輩爲友、講習益精、州縣薦辟、皆力辭、隱居青村、授徒著書、學者稱青村先生、

蘓伯衡

(明)蘓伯衡字平仲、金華人、徽猷閣待制遲八世孫也、

遲眉山蘓轍長子來知婺州、遂家焉、代有聞人、伯衡少警敏、書過目輒成誦、初習舉子業、中年專肄力古文、有名於時、洪武初、召爲國子學錄、陞學正、入史館纂修元史、書成、陞翰林院編修、再以贖辭、賜鈔幣遣歸、旣而宋濂以翰林承旨致政、天子命舉可以自代者、濂以伯衡應詔、至復固辭、上憫其誠、特賜文綺遣之、復起爲處州教授、無何以撰進表牋觸諱、逮置獄、二千恬怡、叩登聞鼓、院請代、亦併彼刑、天下傷之、初伯衡在朝、作登極表、有云雲從龍、風從虎、幸逢千載之昌期、河出圖、洛出書、願徵萬年之泰運、一時共相

傳誦、又嘗作畏慎箴曰、君子宅心若救火、用畏爲水、若防川、用畏爲土。若馭馬、用畏爲勒。肆厥心、固有弗存、君子蒞事、若治絲、用慎爲經。若運輻、用慎爲轂。若除蔓、用慎爲斤。肆厥事、固有弗濟。其見幾防患如此、而卒不免。伯衡在明初、爲文章甚有聲、所著有空同子、以自附於諸子之列、其論文篇曰、尉遲楚好爲文、謁空同子曰、敢問文有體乎、曰何體之有、易有似詩者、詩有似書者、書有似禮者、何體之有、有法乎、曰初何法、典謨訓誥國風雅頌、初何法、難乎易乎、曰吾將言其難也。則古詩三百篇、多出於小夫婦人。吾將言

其易也。則成一家言者。一代不數人。宜繁宜簡。曰。不
在繁。不在簡。狀情寫物。在辭達。辭達則二三言而非
不足。辭未達則千百言而非有餘。宜何如。曰。如江河。
何也。曰。有本也。如鍵之於管。如樞之於戶。如將之於
三軍。如腰領之於衣裳。何也。曰。有統攝也。如置陳如
構居第。如建國都。何也。曰。謹布置也。如草木根而
榦。榦而枝。枝而葉。而葩。何也。曰。條理精暢而皆有附
麗也。如手足之十二脉焉。各有起有出有循有注。有
會何也。曰。支分派別而榮衛流通也。如天地焉。包羅
六合而不見端倪。何也。曰。氣象沉鬱也。如漲海焉。波

濤湧而魚龍遊。何也。曰浩瀚。詭怪也。如日月。如朝夕。
見而令人喜。何也。光景常新也。如烟霧舒而雲霞布。
何也。曰動蕩而變化也。如風霆流而雨雹集。何也。曰
神聚而冥會也。如重林如邃谷。何也。曰深遠也。如秋
空如寒水。何也。曰絜淨也。如太羹如玄酒。何也。曰雋
永也。如瀨之旋如馬之奔。何也。曰回複馳騁也。如羊
腸如鳥道。何也。曰縈紆曲折也。如孫吳之兵。何也。曰
奇正相生也。如常山之蛇。何也。曰首尾相應也。如父
師之臨子弟。如孝子仁人之處親側。如元夫碩士端
冕而立乎宗廟朝廷。何也。曰端嚴也。溫雅也。正大也。

如楚莊王之怒。如杞良妻之泣。如昆陽城之戰。如公
孫大娘之舞劍。何也。曰激切也。雄壯也。頓挫也。如菽
粟如布帛。如精金如美玉。如出水芙蓉。何也。曰有補
於世也。不假磨礱雕琢也。將惡乎以及此也。曰易詩
書三禮春秋所載。邱明高赤所傳。孟荀莊老之徒所
著。朝焉夕焉。諷焉咏焉。習焉斯得之矣。雖然非力之
可爲也。聖賢道德之光。積於中而發乎外。故其言不
文而文。譬猶天地之化。雨露之潤。物之魂魄以生。花
曼毛羽。極人力所不能爲。孰非自然哉。故學於聖人
之道。則聖人之言。莫之致而致之矣。學於聖人之言。

非惟不得其道。并其所謂言。亦且不能至矣。尉遲楚出以告公乘邱曰。楚之於文也。其猶在山徑之間。與微空同子導吾出也。吾不知大道之恢恢。於是盡心焉。將於文。倘焉無難能者矣。空同子二十八篇。合文集。共十五卷。

論曰。蘓平仲抱先幾之哲。兢兢畏慎。脫屣榮名。保身之道。可謂密矣。卒之禍起意外。父子俱刑。惜哉。

張孟兼

張孟兼名丁。以字行。浦江人。孟兼爲人。侃侃自許。涉獵書史。有俊才。會天子詔徵才能士。郡縣以孟兼名。

上擢國子學錄、遷太常丞、孟兼自負能爲文、常奴視同輩、而是時誠意伯劉基、與翰林學士宋濂、皆爲天下所尊信、基豪不肯妄下人、而獨喜稱孟兼、上嘗問今天下文章士、基對翰林學士宋濂第一、臣基次之。又其次則有張孟兼。孟兼旣爲基所稱、益自高、濂亦才孟兼、欲薦之、而未有其會、適上欲用越僧證、急欲得其文觀之、而證方遺書孟兼、論性命、濂因言太常丞張孟兼所有之、命濂召孟兼、以證文至上、覽畢、顧孟兼謂濂曰、張丞、鄉門人也、曰臣里中子耳、且言其才、劉基數稱之上、熟視孟兼曰、生骨相薄仕途、當徐

徐進乃可耳。未幾，除山西按察司僉事，遷副使，移山東，而山東布政司吳印乃鐘山僧也。上特擢用之。孟堅以其僧慢侮之，乃先爲所劾，論棄市。孟堅廉勁疾惡，爲人所陷，卒於身死。

論曰：士不患無才，有才而患無器以居之。孟堅負才驕人，其爲身害奚怪哉。

吳沉

吳沉，字濬仲，蘭谿人。師道子，與兄深傳其家學，名重一時。洪武初，以薦授翰林院編修，嘗輯六經辭義爲兵家言五篇，一曰兵象，二曰兵用，三曰兵禮，四曰兵

詩五曰兵訓。題曰六經師律。以爲聖人之兵。所以昭
文德。威不軌。生人而非殺人。禦亂而非爲亂也。天地
之所造設。聖人法之。掌之有其官。定之有其制。教之
有其時。備之有其素。歌詩以勞之。誓戒以齊之。上順
乎天。下應乎人。廓然而大公。神武而不殺。豈孫吳之
所能測哉。嘗撰千家姓進御。又進精誠錄三卷。先是
上謂沉等曰。朕聞古昔聖賢垂訓立教。大要有三。曰
敬天。曰忠君。曰孝親。其言散在經傳。未易會其要領。
爾等其以三事。以類編輯。書成上之。乃賜此名。沉以
文學膺寵眷。官至東閣大學士。禮遇亞於宋濂。以懿

文太子故宮人讒之下獄，竟死。時況已歸隱，聞之，尹源械繫至京，太子營救不能免，朝野傷之。

論曰：明初金華有魁儒者五人，曰宋景濂、王子克、胡仲申、蘓平仲、吳濬仲。惟仲申以不仕獲全。子克殺身成仁，可謂克終。餘則皆死於罪，拔茅彙征，胥首受戮，羣儒之劫，適丁泰運，千古而下，爲之吁歎。

朱廉傳藻楊芾

朱廉，字伯清，義烏人。少力學，淹貫經傳，領其要義，既遊黃潛之門，遂以文章知名。明太祖定婺州，太守王宗顯辟爲郡學師。浙東行省右丞李文忠開鎮嚴州，

尤加禮敬、遂移長鈞臺書院、洪武三年、詔修元史、聖朝日厯、起爲纂修官、史成授翰林院編修、八年、乘輿巡幸中都、命廉扈從、駕至滁、廉進詩十章、上覽而喜之、稱爲佳詩、曰朕爲汝和、仍賜和詩六首、旣而授經楚府、陞長史、以病蹟致仕、廉篤志儒學、探索微義、嘗取朱熹語類摘其精要、名曰理學纂言、廉爲人嚴謹、續密、有文集十七卷、

傅藻、字伯長、義烏人、受業黃潛門、以文章知名、潛修邑乘、屬王禕、朱廉、藻亦與焉、洪武五年、由本縣儒學名對稱旨、授翰林編修、等改應奉文字、尋以監察御

史奉敕按鳳陽獄、叙其道途所見、爲詩若干篇、寫進
諫之意、因召對華蓋殿、進呈上覽之、大悅、作四
首、賜之、未幾轉東宮文學、出知武昌府、以薦擢河南
廉使、所至皆有聲、旋致仕、卽所居義門地、號杜門、建
杜門書院、

楊弼、字仲彰、義烏人、徙居東陽、性穎悟、少力於學、早
從陳樵遊、復登黃潛之門、文辭典雅、操筆立就、洪武
初、聘爲義烏學官、膺薦上京、辭歸、所著詩文有百一
榮、無逸齋稿、又輯元詩爲正聲類編、總若干卷、學者
稱鶴巖先生、子璵、璵俱能詩、璵嘗補金華賢達傳、

鄭錡鄭瓘

鄭錡字威甫、號聽菴、蘭谿人、登成化乙未進士、任靖江令、平易近民、有惠政、丁內艱歸、靖民設像尸祝之、致仕不復出、與章懋同修蘭谿縣志、所著有聽菴稿、子瓘、

鄭瓘字溫飛、號北園、治庚戌進士、爲長洲令、瓘遇事英發、持論過激、與時不諧、陞楚雄通判、致仕、所著有道德經陰符經正解、禮儀纂、鳴蛙集、等書、

王宗聖

王宗聖字汝學、別號賓湖、義烏人、登嘉靖甲辰進士、

授興化府教授、陞國子助教、從祭酒程文德學士、
懷、講明理學、轉南京工部主事、著督蕪湖、及蘆洲國
稅、釐革宿弊、商旅悅服、陞刑部郎中、遷福建兵巡僉
事、時適有倭寇、調遣勦集、民獲寧宇、旋致政歸、築室
繡湖濱、督學屠公禮聘講學於本邑學宮、與邑令趙
大河、發明經權忠恕之義、所著有賓湖稿、五十卷、權
政記、十五卷、太極圖跋等書、

姜麟

宜入儒學

姜麟、字仁夫、蘭谿人、早遊楓山之門、父璉本姓徐、以
其先爲贅壻於姜、遂姓姜氏、璉講學爲文、度越流輩、

登天順庚辰進士、歷官贛州永平二郡守、通敏有政績、嘗大書榜於公堂云、治官事、如家事、以民心爲已心。麟登成化丁未進士、授刑部主事、轉員外、陞四川僉事、定馬湖之亂、不以兵戈、然氣高招謗、爲言官所劾而歸、家居杜門謝事、心胸宏濶、議論高古、以學問文章名一時、居官時、曾奉使貴州、特迂道至白砂、謁陳獻章、曰吾聞人多矣、如先生者、耳目口鼻人也、其所以視聽言動者、殆非人也、人問之曰、活孟子、活孟子。

童俊、字邦英、蘭谿人、以乙科知嘉定民好田獵、俊教以力穡、至今祀爲稷神、又知趙州、因內臣王政巡歷、耻於折腰、遂致政歸、民攀留不得、立祠祀之、居家喪殯不繼、或撤其几、以易米處之、怡然、日夕考索經傳、作書韻會通若干卷、童氏所居、卽香溪故里、明時甲第聯翩、而三童最著、士論評其家學、精則童品、博則童琥、兼之者俊也。

童品、字庭式、號慎齋、幼與章懋齊名、成化丙午舉南畿、又十年弘治丙辰、始登第、或勸其減年通籍、曰吾早學而晚達、命也、敢爲欺乎、初授南庫主事、遷武選

員外郎、與楊廉邵寶蔡清相友善、兩考、遂引年致仕、
家居十九年、讀書喪明、貧不自振、卒所著有周易羽
義、春秋經傳辨疑、禮記大旨、正蒙發微、含章子集、金
華文獻錄、若干卷、

童琥、字廷瑞、號草窓、登弘治庚戌進士、任刑部主事、
歷官江西按察副使、竣事歸、所著有梅花集句數百
首、和梅花百詠、寫懷集、釣臺拾遺等集、梅花集句、至
今傳誦、其精者五言、則有如皎月散清影、元劉東風
遙暗香、元葉晚香傳遠樹、元許春春色上寒梢、元葉野
渡冰生岸、唐皇曾孤村雪擁籬、宋張孤標、能自保、元許

一壑不妨專。宋劉籬疎還有艷。唐許樹老半無枝。宋

平不知春色早。唐王已與歲寒謀。唐顧城曉風高角。

唐李山空月滿樓。元黃此時逢國色。唐白何處避春

愁。宋朱獨有烟霞染。宋梅不知霜月寒。宋謝○七言

如暗吐幽香穿別院。宋田數將疎影上雕欄。宋葉半

灘流水浸殘月。宋陸一片寒光接素霞。唐張愁生細

雨寒煙外。元倪夢遶孤雲落日邊。宋陳兩岸嚴風吹。

玉樹。唐常一溪春水浸雲根。唐胡素韻只應天上謫。

宋張繁枝疑自月中生。唐李薄薄遠香來澗谷。宋梅

微微春色染林塘。唐陸謝客瓊枝方貯眼。唐李漢官

嬌額半塗黃。

宋王半山

臘盡山中三尺雪。

元僧行已

月斜樓上。

五更鐘。

唐李商隱

越使可能千里致。

元馮海粟

故人不寄一枝。

來。

宋朱晦翁

孤根欲老冰霜國。

宋張澤民

晚節猶存鐵石心。

宋朱

東坡。

幽香入室有餘韻。

唐皇甫冉

老樹着花無醜枝。

宋梅聖俞

明

月自來還自去。

唐崔魯

東風吹落復吹開。

宋歐陽永叔

論曰、童庭式文獻錄、草窓梅花集句、予皆寓目、邦

英文不概見、既與二公並稱、則其為博之儒可

知也、

章适

章适、字景南、蘭谿人、受學於凌瀚、步趨言語、皆有師

法舉嘉靖丁未進士授行人擢禮科給事中時世宗
諱言倦勤羣臣無敢論及儲君者迺獨進東宮講讀
疏雖忤上旨而風節愈著未幾引疾告歸遂不起家
無餘儲蕭然若布衣所著道峰集吳門王世貞徐枋
並爲之序四明楊德周稱其詩五言律則有秋聲上
木葉暝色下樵蕪荒雲留古嶂夕照下平蕪村煙全
傍水城邑半藏山過建德畏餌魚全沒歸林鳥不鳴釣臺
孤城傍海月戍鼓應春潮風塵留劍氣山水會琴心
七言律如寒生絕塞冰霜早秋老滄江木葉飛雞鳴
旅客催炊黍月落溪船獨上灘溪春隔水自相應野

火穿林時獨明。七言絕如無限相思。瑤草碧。鳳聲渾。
不到江南。松雲滿地。石門古。開遍碧桃無限花。溪山
好處行人少。盡日空林一草亭。迺弟述字景明。遺字
景德。俱能詩。

徐學聚 祖袍子典參

徐學聚字敬輿。號石樓。蘭谿人。祖袍字白谷。舉於鄉。
博學高行。從遊常數百人。所著字典考畧六卷。父用
光登嘉靖庚戌進士。仕至工部郎中。有清名。學聚名
家子。於學多所該博。登萬曆癸未進士。由浮梁知縣。
歷官至御史中丞。巡撫八閩。所在皆有政績。其撫閩

時請以延平李侗。豫章羅從彥。從祀孔子廟庭。得旨下。部議。詔令天下郡邑從祀。所著有本朝典彙二百餘卷。子與參。字原性。儲書之多。與胡應麟等。因不戒於火。悵然不怡。仍卒。

論曰。徐氏之學。起於白谷先生。傳世四代。奉爲家寶。原性雖不仕。而風雅之聲益著。吳賜如稱其博聞多識。工書法。善鑒別。所收古書畫。尊彝金石遺文甚衆。或歎署磨滅。皆能別其時代。爲浙河以東好事之尤。以是毀其家。蘭谿令吳雪厓曰。自原性歿。吾登大雲山。觀雲物。皆有異也。其爲時賢思慕。

如此

陸可教

陸可教字敬承號葵日蘭谿人幼英敏日誦數千言九歲能屬文登萬曆癸丑進士第二人授庶吉士歷官至南京國子祭酒轉北雍尋陞南京禮部右侍郎丁父憂歸卒天啟改元賜祭葬贈禮部尚書可教登第文與馮夢禎齊名至今有瑜亮之目其在館閣所著文典贍詳整爲時所重分校禮閣者一典會試者一典江右鄉試者一典應天鄉試者一所著有陸葵日集

李鶴鳴

李鶴鳴字九臯、以正德丁丑進士、歷官吏科給事中、
差察內八府莊田、嚴覈侵奪、事竣稱旨、上錄名御屏、
轉兵科右給事中、左遷金壇丞、巡撫侯位、特疏薦其
力任千鈞之重、才堪八面之敵、特旨復原職、時安南
新降、會推朝臣有才望者、往撫諭之、陞大理寺右寺
丞、仍兼舊職、以不合於時、歸、鶴鳴器識宏深、才猷練
達、風采甚著、性友愛、蚤孤、受學於伯兄鶴年、旣通籍、
祿入無所私、婚嫁弟侄、同已子、詩文清妍雋麗、所著
雙杉亭草十二卷、虞山錢謙益錄其詩於列朝詩中、

胡應麟

胡應麟字元瑞、蘭谿人、自號少室山人、父副使僖、應麟九齡時從里師學經生業、卽不好、獨好爲古文辭、弱冠副使北上、挾與俱、時南海黎惟敬歐楨伯、吳興徐中行、吳郡周公瑕、輩十餘子、先後抵燕、見應麟所業文、咸折節請交、每燕會、應麟年最少、坐末席、片語出、皆爽然自失、伏其隸事之精、俄得羸疾、歸卧山中、大司空朱衡過蘭江、踪迹應麟、應麟匿不見、泊舟待三日而後見之、卽以其所作示學使者滕公、曰、天下奇才也、因是兩試皆冠軍、已得薦鄉書、然應麟意不

在一第、所交皆天下賢豪長者、而所心折獨太倉王世貞、歷城李攀龍、新安汪道昆、暨世貞弟世懋、世懋曰、吾於詩畏于麟已矣、今庶幾得應麟、應麟卧山中、凡六載、始上公車、過都下、遇張九一於湖上、大司馬汪道昆、大將軍戚繼光、皆至、而大司馬張佳胤、方撫浙、爲文酒之會、賓客皆一時之傑、然莫不傾心應麟、應麟因介道昆、謁王世貞於太倉、時天下才士、以聲名相標榜、而世貞爲之魁、業詩文者、皆奔走於其門、片語借榮、若輦帶、於是有七子、五子、又五子、末五子之稱、應麟旣見世貞、盡出其所爲詩文示之、世貞乃

歎曰。前我而作者。涵洪併纖。吾推李。獻吉。然不能諱其滓。絕塵行空。卿雲爛兮。吾推徐。昌穀。然不能諱其輕。刻羽雕葉。舍陳而新。吾推高。子業。然不能諱其促。鞭風馭霆。以險爲絕。吾推宗。子相。然不能諱其踈。融而超之。于鱗庶幾哉。時時見孤詣焉。後我而作者。其在子矣。列之五子之中。蓋應麟之重。以世貞。而世貞亦自重。應麟。應麟旣不得於南宮。益肆力於學。夫何世貞疾革。應麟急往。世貞曰。吾忍死待子。屬以較勘續集。世貞旣歿。應麟乃入白榆社。白榆社者。汪道昆爲首。道昆之稱應麟。則曰。成都博而不核。弇州核而

精博而核。核而精。莫如元瑞。夫何道是歟。老宿主詩壇。大江以南。向之趨新安者。皆裹糧接踵。於婺州。翕然宗之。無異詞應麟於世俗。都無所好。顧獨喜藏書。築室城隅。號二西山房。購書四萬餘卷。分別部類。類劉氏七畧。其所自著。亦名四部稿。詩八十八卷。文四十卷。詩藪十八卷。筆叢四十八卷。行於世。他所著有六經疑義二卷。諸子折衷四卷。史藪十卷。皇明詩統三十卷。皇明律範十二卷。擬古樂府二卷。古韻考一卷。二西山房書目六卷。六遊紀畧二卷。兜玄國志十卷。酉陽續俎十卷。隆萬新聞四卷。雜聞六卷。

駱侍御忠孝辨一卷、補劉氏山棲志十六卷、羣祖心印十卷、方外遐音十卷、澄懷錄一卷、抱膝編十卷、真賞編十卷、會心語四卷、計三百四十七卷、而詩藪筆叢最爲時所重、

論曰、弇州之稱詩藪、則曰不啻史遷之上下千古、而周密無漏勝之、其刻精則董狐氏韓非子也、而元瑞之贊弇州、則孔子後一人而已、魯之所聚、謗亦隨作、曾不數年、鍾伯敬、譚友夏之徒起、盡掃七子之派、而元瑞之學、幾於不振、迨虞山錢受之起、而稱詩、則又併王李鍾譚而俱推陷之、詩人相輕

類多如此。至其甚詆少室。爲文字與臺噫過矣。

斯一緒李能茂

斯一緒字惟武號懷白東陽人父正官巴州守一緒少英敏爲博士弟子累試不第卽棄舉子業攻古文辭發中學者皆以理學名家後進慕之且不知有魏晉無論秦漢一緒獨嚶嚶慕古乃言曰今經儒先生好言意吾謂有其意無其辭何取又好言六經夫典謨雅頌彖繫二禮三傳苟無其文何傳自宋以來儒者之意廓如也其文卽使孺子操牘一息萬言矣夫論辨以稱詩詩亡矣通達以考文文亡矣是烈於劫

火何秦坑足云乎聞者皆愕然而一緒持此以終岸然勿顧也其初出徐中行門爲人倜儻不修邊幅飲酒無所節嘗與諸少年僦舍錢塘市中舍東壁儲蕩口酒數十甕閉門飲飲畢以空甕投舍西幾滿入門往往以醒而寐不能竟試督撫泓陽王公讀其詩而壯之爲具賓主禮曰生將遠遊吾爲治裝旣而王公奪職曰吾歸矣無以爲生計因移書薊鎮督兵使者張公使延致一緒一緒遂入燕草䟽數萬言欲上之時鄉人爲納言格不上一緒出塞以邊使者客交歡大帥諸大帥皆厚禮之因教之上書言便宜復爲鄉

納言所格、而遺書張君令善遺之、一緒遂歸、客胡應
麟所、爲定次巖棲諸稿、彼此揚扇、甚洽也、而名益藉
甚、前後郡邑大夫、鮮不客遇一緒者、一緒自書刺、必
曰部下布衣、攝敝衣冠、分庭抗禮、無所絀、或得金卽
付酒家、一夕俱盡、家故累千金、以跣跣故、日益落、家
人至不能具朝餽、於是走匿野寺敗屋中、風雨歲暮
猶不歸、人或踪跡之、不能得、俄遂卒、一緒爲詩文、不
自惜、隨手散棄、族孫谷雲和尚拾其遺篇、爲懷白山
房稿、其五言律、則有小園偶憩、寄懷李允達、則云、杖
策重炎逼、尋陰一憇回、窓移隣樹影、砌積隔春苔、池

館局煙柳。風流憶酒杯。誰令懷舊賦。向子獨堪裁。塞
下曲。則曰。草別故園綠。路經窮戍寒。天山從此雪。萬
里正漫漫。帶甲宵難夢。聞笳夕未餐。裁衣休准舊。俠
骨半消殘。秋夜則云。風噎仍歸雨。牕幽更及寒。葉知
遙夜變。髮畏入霜看。旅夢蛩聲散。天涯物候殘。誰能
留蕙草。不並衆芳闌。七言律蘓觀察至嶺右則云。去
矣。簷帷共黯然。將軍何處問樓船。天窮象部千峰外。
地擁雞林七驛前。視草玉堂應計口。傳書銅柱易經
年。無勞更閩河東記。鉅錙潭邊萬象懸。秋懷五首其
二則云。秋蘿製就挹清芬。八詠初裁酒半醺。祗羨使

君能下榻。何愁孺子不工文。霜凋深樹通山雨。鴈渡
煙汀破壑雲。徙倚高樓新物色。溪潭雙水映寒暄。其
四則云。塞上風煙落日斜。當年一缺度黃花。班生銘
石虛懷想。終子捐繻誤歲華。較獵胡笳驚鳳闕。防秋
漢騎出龍砂。五陵年少從軍樂。回首長安七寶車。雖
七子流派。而風骨自存。

李能茂字允達。東陽人。以其爲侍御學道仲子。故又
稱仲子。少負氣。從其父至齊魯間。見濟南瑯琊詩。慨
然有千古之志。落筆雄健。與同郡胡應麟相知善。應
麟稱之於太倉王世貞。世貞亦自雅知能茂。有儁朗

之目數遺之詩所以屬之者良厚年三十餘抱病不起所著有甲邇亭稿武林唱和集友疴山房集吳之器楊德周皆摘錄其詩五言則有如薜荔封囊草芙蓉澁劍花路通秦望北山斷禹陵西急峽魚龍鬪深林鶴鶴呼雨勢滄江動秋陰大麓長七言則有如謁帝星辰天北畔懷人風雪海西頭秦淮鵲首春煙合建業驄前暮雨寒白眼中原無倒屣青春故國有加餐諸天風雨開樽斷列郡樓臺入夜封絕壁天痕開暗谷空江月色散輕濤朔雲鳴鴈黃花盡落日滄江白髮哀平林夜火漁舟出極浦秋聲鴈陣移皆雄健

可誦、

論曰、昔者聖人之繫易曰、修辭立其誠、又曰言之無文行之不遠、言以足志、文以足言、文質彬彬、斯則著述之極則也、懷白山人譏世之有意無辭是矣。然自七子之風盛、吾婺學者鼓其餘波、而浮誇之弊不免。國初淳樸之意浸息、然觀其一二零篇、鑄辭立格、皆有師匠。要非苟作。李仲子筆力雄健、倘假以年、豈易限其所至。長才屈於短筭、惜哉。

徐應亨

徐應亨、字伯陽、蘭谿人、以萬曆乙卯舉於鄉、其業詩

精專甚多。反古振始之音。好稱說先輩。早遊胡應麟諸公間。而不踵其故武。嘗言嘉隆諸君子。但知少陵壯語爾。夫有吳楚東南坼。乾坤日夜浮。不有飛星過水白。落月動簷虛乎。有千家笛裏關山月。萬國兵前草木風。不有含風翠壁孤雲細。背日丹楓萬木稠乎。夫詩之氣格者。水鏡也。興象者。花月也。學者澄水瑩鏡。待花月之至可也。今以濁水昏鏡。而皇皇焉。花月之索。豈有幾乎。故應亨詩。於漢魏以還諸家。體擬作殆徧。在本調。什不失二。其七里瀨。次謝靈運曰。杖策臨高臺。落日展遐眺。峻嶺鬱崔巍。傾壁屹峭峭。冷冷

山溜鳴。燁燁紛葩曜。凌雲激楚辭。承風舒阮嘯。幽巖
叩虛牝。玄解覽衆妙。猥嬰好爵情。徒竦攢峯銷。洗耳
潁川流。投足濮水釣。咄彼羊裘人。千載庶同調。富春
渚。曰。倚棹富春渚。遙望青山郭。麗譙俯通波。晴川映
藁薄。蒼翠杳芊鬱。金碧相間錯。翔鳥依密林。潛虬泳
幽壑。俛仰懷苦心。逍遙思遠托。高尙諧夙昔。卑棲困
微弱。北渚悵佳期。東山赴宿諾。玄覽有合并。空花歟
開落。旣秉齊物觀。焉辨龍與蠖。定山次沈約韻。曰。昨
宿赤亭渚。茲晨發定山。洪濤鼓木末。翠巘疊波間。游
魚弄藻影。搖曳不成圓。迴潮流活活。觸石水濺濺。坻

平綠如剪。林繁花欲然。佳期遲歲月。雜佩寄蘅荃。還
顧望松子。淹留竚九仙。所著有吳越集、十笏齋稿、庚
申篇邊事詩、其司論增城也、有羅浮集、南海集、俄以
親老量移慶元諭、有樂在軒槁、應亨爲人淵雅簡靜、
每羣邑庭中、士夫旅立、後進浮薄、一息萬狀、客不能
堪、則引避去、應亨處之澹然、久與之交、未嘗見有鄙
言贅行、吳之器稱其爲君子人云、

龔士驤

龔士驤字季良、義烏人、貌偉、善談辨、慷慨有志節、然
諾不欺、父一清卒於嶺右臬署、士驤四歲而孤、母不

急就使學、輒自就塾師讀、十四補博士弟子、能爲古文辭、然性好弄、氣凌其儕偶、見之皆匿避、已而折節讀書、造請諸賢豪長者、不避風雨、又酷不能治生、卽囊中贏一錢、夜不能寐、旦起卽貰酒召客、閉門轟飲、古玩叵羅之屬、恒在子錢家、過當卽割膏腴償之、所餘止旣脫、而豪不少衰、凡星氣握奇博射、暨形家軒岐諸方技、一見卽能習試、而不能洞精、又好治藥物、化黃金、不驗則更端試之、士驤以天啟辛酉舉於鄉、戊辰成進士、授溧水令、暴卒、年四十三、士驤於文最矜慎、嘗以爲文者、經緯宮商、古有定體、昔平原文賦

於時體製未離特就體求工耳自唐以來厥體既乖
千輪覆轍如序記碑贊銘碣之屬或出莊左旁涉史
漢不知史與子且非同流已難共貫妄師其軌以屬
篇章何異綴豐貂於狐腋錯吳綳於齊紈因作續文
賦以明文章之源詆近世之陋人多不能堪其於詩
自謂降格爲之亦有玄勝不必開盾便足登峯然不
能措意改作多以句勝不能以篇有春興十四首吳
之器所謂首尾溫麗者其六曰長途新柳報清明綠
滿平蕪海燕輕花攪旅愁飄宿雨樹留霜葉下初晴
客心暗火遒時熱草際浮煙犯禁生容鬢漫憐申迹

遠。年年春色負多情。其七。縹緲遊僊帝子家。畫樓一
半倚晴霞。吳潮夜蕩隋宮月。淮水春浮楚國花。但有
綺羅驕粉蝶。更無雞犬試丹砂。綵輿日日鳴簫鼓。多
少春心隔絳紗。其九。黃鶴樓頭坐夕曛。白蘋堤外急
波紋。岳猿夾嶂啼湘雨。江鳥啣花上楚雲。夢澤草痕
煙外細。武陵春色洞中分。仙人舊事今寥落。惆悵梅
花笛裏聞。其十一。侯門夜啟御溝花。鼓蕭嚴城響暮
笳。樂部紫衣嬌樹月。天街紅燭影春紗。侏儒有米分
臣朔。上客無人識孟嘉。信馬垂鞭羅袖薄。畫樓楊柳
正藏鴉。皆雕繪有深永之致。

吳之噐

吳之噐字賜如、號神岳、義烏人、吳襄毅百朋曾孫、祖大纘、字子孝、乙科、父存中、字致之、爲古文詞、皆有聲、存中年三十二卒、之噐侍其祖大纘學、年十八、爲諸生、二十七、餼於庠、遂以曾祖門廕爲官生、家有抱甕園、藏書十餘楹、之噐坐卧其間、流覽誦記、鼎彝俱廢、如是十年、遂爲儒、與斯一緒、龔士驥、陳達德、章有成、六、七人爲八詠樓社、稱詩談藝、近宗少室、而遠祖太倉、至於史學、自謂有得於班氏之微、太倉知紀傳之分、不甚知其合、繩以孟堅之法、合者半、離者亦半、

之器雖與一緒諸子爲伍然論其所學諸子恐不能望其項背之器爲八詠社時郡司李吳載鰲博雅君子也與之器有成共登玄暢樓歎曰壯哉郡也此隱侯之所留連孝標之所棲遁也是中有人述而志之非兩君子乎有成謝不敏之器獨慷慨談史事甚悉載鰲曰國家方全盛蘭臺石室之所傳山崖屋壁之所秘搜而簡之宜有完書子又何辭焉於是取藝哲隸以史法作藝書崇禎壬午試南闈與鄉薦之器爲人介然特立家居布袍蔬食內外肅雍而志量恢思理淵湛杜門著書當世賢豪長者多樂與交又詣

知當世治亂得失之故。因挾策遊兩京。慨然有匡世志。在公卿間。數陳軍國大計。言往往多中。當路交推之。或有惡而泥之者。之器乃歎曰。管幼安。鄭康成。何人哉。吾何爲於此。因賦詩曰。岌岌泰山桐。製爲漆鳴琴。徽以闐河玉。絃以朱絲繩。清夜閒撫之。殊音肅泠泠。一終舞雲鶴。再變貫秋旻。鍾曠久已往。此曲誰爲聽。遂歸在家著書。不復出。所著婆書之外。曰婆書別錄。明月齋爲詩經春秋測史推古今句圖雜錄。官方宮鍾秋牕雜抄。物記禮藁閣鑑香草編。露香采香雜題。後履譜。石困八鈔。藝苑指歸。四種古今詩。係六十

四家古詩、廣雅、樂府翼、南唐詩細、填辭家錄、明月齋
後刻稿曰、秋聲、離資、橘服、登蘋、綺雲、大樽、溪南、經鉏、
尊拙、聽雪、白醉、古今官意、閨意、春問、三賦、

章有成

章有成、字無逸、章文懿公懋曾孫、爲人豐頤美髯、又
稱髯翁、幼孤事母、以孝聞、旣爲諸生、才瞻學博、有聲
於時、與斯一緒、龔士驤、諸子爲八詠樓詩社、蘭谿令
吳國琦、以才子領縣、巖峻、門無雜賓、獨與有成為忘
形交、旣去、貽之書曰、僕於蘭谿、都無所戀、惟一片澄
江、數峯黛色、及足下與賜如數兄弟、極不忘耳、明季

兵亂、以有成華胃、縛而索金、鞭撲極楚、有成紿至藏
金處、脫身投井、其子瑗、載而出其首、得活、而瑗死井、
故有亭、因號義井、亭明亡、絕意進取、所居有上客軒、
與同邑趙淳、吳鯤、范開文、稱子愚公、爲詩酒社、其別
墅曰谿堂、濱有岩突起、名小赤壁、每風日佳、娛則邀
數子、携樽泛舟、其詩曰、無雨半春堪載酒、有山一畝
卽爲家、有成雖瓠落、詩文聲氣、遠播江表、如閩中曹
石倉、蘭陵孫承公、錢塘熊雪堂、連契尤深、詩文郵寄、
往來不絕、郡司李張公、屏騶從、造廬請謁、望門下車、
劇談盡歡而去、凡官於婺者、莫不嚮慕有成、有成二

無所干，故人益重之。旣喪偶，有侍兒在側，卽遣去，得
鰥居之樂。嘗有詩曰：人今難問舊衣敝，不求新。又曰
花移難借影，琴在可無絃。性善飲，不喜肥濃，常血菹
核小酌，陶然自樂。豪家饗客，以得招致爲榮，或移席
就之，性所不宜，卽落落無歡。嘗有詩曰：貧藉更增隣
舍慢，嬾嵇自怪友生稀。柴桑麴蘖非真好，多事移樽
到白衣。書法鍾太傅，頗厭求索。嘗有詩曰：君才真國
寶，臣法匪奴書。詩法太倉歷城，而頗歸真淡。生平最
推稱胡少室，時二西山房已歸他姓。有成過之，慘然
不樂。嘗有詩曰：空餘池館勝遙想，舊登臨當代辭章。

手。窮年著作心。六書翻鳥迹。四部陋蟬吟。寂寞玄亭下。桓譚獨賞音。好獎勵後進。或以文就正。必多方誘掖之。國初文獻凋零。有成與烏傷吳之器。皆先朝遺老。搜亡補缺。使先賢編帖。幸而僅存。皆賴其力。卒年八十餘。

程明試

程明試。字式言。永康人。京兆尹正誼第四子。少英敏。既入泮。遂入北雍。所交皆天下名士。既而歸養於家。構七松書樓。定省之暇。閉戶讀書。凡經史諸子。稗官野乘。百家九流之書。無不周覽。每嘆諸家彙書。如御

覽合璧、冊府六帖、玉海、廣記、初學藝文、多所異同、欲
爲考訂、作博古事海、約數千卷、未成而卒、時方三十
有二、遺篋所存、僅得程子樛言、七松吟稿、海運議、數
帖而已、深明儒釋合一之理、著有心經、出古、并松廳
頌古等書、頌古者、採唐宋以來、大臣巨儒、如富鄭公、
趙清獻、陳瑩中、潘默成、諸公、與大僧勘辨機鋒、而作
爲歌頌者也、樛言蓋未成之書、倘天假之年、得究其
學、何遜於考索淵海哉、明試生三子、後嗣甚繁、今嗣
玉嗣音、及部郎敬一、皆其後人也

李鳳雛

國朝李鳳雛字紫翔世居東陽高祖學道明隆慶間
爲御史事許名臣傳父振聲號石艇子工詩爲勝朝
遺民著有石艇子詩集鳳雛詩得之家學弱冠卽工
太倉相王公揆爲浙江學使鳳雛作梅花詩十章上
之王公以才士目之貢入太學國子師試瀛洲觀荷
詩拔萃名大噪傾動公卿間都下才士林立少足當
其意故交雖廣而不終再應舉不中乃歸至蘓與尤
公侗彭公定求唱和後乃執贄蕭山毛西河先生之
門年五十以教習謁選得曲江令一年仍以強項落
職發五仙驛爲徒鳳雛因白號仙驛狂奴自此而鳳

雛名益振、名章、登山、照曜珠江羊城間、卓然寡儔、以父喪釋歸、而東陽令門應瓚方蒞任、見其詩、大悅、待之師友間、亟問、亟饋鼎肉、忽不悅於卒也、彼此相詰、繫獄三年、得釋、性不安貧、頻歲入都、卒於京邸、年七十矣、方行卜之乩、降者爲唐李白、詢之答曰、我卽是爾、奚問我爲、鳳雛遜謝、乩云、我是唐朝舊供奉、擬翻新曲付梨園、非子詩乎、鳳雛曰慚愧、因復以長短句示之、其結語云、直待九九春殘、東門雞狗、西麟悲野、鳳雛愕然、竊意九九當得八十一歲、遂上都竟卒、時在甲辰四月初旬、越數載其孫韶生、赴都扶柩、

云鳳雛美鬚髯，有風儀爲詩文。喜自矜詡倨傲任意，思不防患，故所至輒窮。其詩流布天下，見之者莫不心折其才，固卓然成其爲梧岡也。所著春秋紀傳五十一卷，梧岡詩集、叩心集若干卷，隨筆一卷，古文及詩餘未刻。晚年書法尤佳。西河先生序梧岡集畧曰：有典有則，一矩於雅，鏗然鐘呂之音，而尤長於五七言古。吾老閱人多矣，讀之如擷芳蘭於榛林，覩珠光於蚌澤。其自序叩心集有曰：記云溫柔敦厚，詩教也。予觀三百篇中，刺淫則曰人而無禮，胡不遄死，傷讒則曰取彼譖人，投畀豺虎，諸如此類甚多，何嘗不怒。

目裂眦、言之痛切、予之爲此、未嘗非詩人之旨也、其大意亦可知矣、大抵梧岡詩氣雄詞麗、至於長篇數十韻隨口傾吐、飛珠洒玉、而以大氣幹旋、見之無不傾倒、詩止於六十、六十以後作、與古文皆散失、

論曰、八詠詩社、惟章無逸先生、篤厚長者、斯及龔吳、皆負才矜高、騷賦紀事之文、則吳爲最、宋文憲後、婆才鮮儷、近體詩則不如李梧岡、而五七言尤勝、氣高詞華、擲地作金石聲、而不足於溫厚、觀西河先生弁言、及自序可見矣、春秋紀傳、經當代鉅公評騭、無待予贅、四六近體、及尺牘散文、皆工、惜

其稿失於京邸可慨也。

附錄

予閱石艇詩集。詳序歷履。而繫其詩於後。作詩話一篇。梧岡歸自粵。見之。拜稽首曰。極感先君卽此可傳矣。乃錄其畧。有曰。名高則謗生。遇阨則譏至。議論一中人。真宰失其特。有曰。朱鐫元祐碑。漢興司隸獄。浩浩天地間。白日沉西陸。有曰。文章泄元化。富貴焉能及我食。僅一蔬。我衣僅一褐。但學陶與孟。饑寒復何戚。有曰。壯懷千里志。老居四壁家。落日掩柴門。收淚對黃花。有曰。出無濟世謀。入無資身策。我歌不足歡。

我哭不足戚。悠悠天地間。雖然無損益。有曰登山采
蕨薇。臨川拾薺杜。落日漢諸陵。秋風動禾黍。有曰易
制。千行淚。難降一片心。有曰食梅知酸牙。茹荼知苦
口。無家逐斷蓬。有地餘衰柳。有曰白露下庭除。籬菊
忽已華。真彼窮巷憂。懷此秋色佳。有曰羣居不碍獨。
賞心誰與同。靜然天地理。取用固不窮。有曰海懷泛
溟渤。山想陟崑崙。有曰登山驅白鹿。入海駕青虬。先
生年七十。歲爲自輓詩。至八十餘。合爲一帖。曰蒿里
吟。

葉自合

葉自合字永和。蘭谿人。少讀書。不治舉子業。以師友爲骨肉。以詩文爲性命。以麴蘖爲佐輔。以山川風月爲貴產。從鄉先輩章有成學詩。有成所居曰谿堂。時或風雨號窓。撚鬚覓句。自合常在左右。自合家雖貧。時時營杖頭。不以資妻帑。升斗提壺挈鮮。以趨其師之急。有成歿。自合不忘淵源所自。或遇其師誕忌。賁隻雞樽酒。奠於墓間。咨嗟涕洟。若默見其靈於盃爵間。自合聾善飲。蘭谿令殷廷弼。年少雄於詩酒。延自合與武林人季煌爲上客。每聽政暇。卽邀與暢飲。聯吟。而尤敬自合。爲買田數畝於楊青里。以給餽粥。自

合與殷令酌。和詩最多自無一言。虛讚比失官。冬登
山臨水。見故所與觴咏處。歎歎而言。殷侯自合在蘭
谿口。不談人過。村翁里老。見其幅巾藤杖。逍遙往過。
輒欣然畱款。臘月家居。餽米送炭者。相繼不絕。自合
工書。凡婆中先賢遺集。莫不抄錄。予募刻東萊集。及
徵獻畧。多資之。自言古人抄書之多。無過莊蓼堂。予
可不遜。因自號蓼菴。其爲詩數十韻。頃刻立就。歲爲
一編。臨歿。囑其子寄予。予何能傳其詩哉。因錄數首。
附諸文學之後。如戴以經書樓。隄絕蒼巒。數畝居。繁
香異卉。遶階除。蕙分楚畹。駢枝秀菊。傲南村百品。餘

掃席延賓重設醴。曲樓施架。但藏書。霜宵雨夜青燈
閣。聽得清吟徹。太虛其二。蘭陰蒼翠。隔湘簾。水遠窓
虛。碧浪涵夜月。笛高停。西舫春波。風暖送輕帆。溪容
似綺霞。沉浦曉色如螺。雨過巖。駘蕩晴光無限。思飛
花香墮。鳥爭啣。送王鶴潭歸東陽。哀鴻鳴霜晨。衝風
度南樓。况值歲云暮。客子方倦遊。江郭融旭霽。行將
理歸舟。携筇急送之。吹面風颼颼。老人重離念。何以
申綢繆。江店酒可酤。聊欲挽少留。含盃悵夕暉。俯瞰
長江流。江流歸大壑。客子反故邱。愧乏綺筵私。長抱
此窮愁。願言懷好音。玉書寄星郵。皆高雅。有古意。

論曰、文學傳錄詩。蓋婆書之例云。竊思吾婆如蘭
谿杜氏五高。于石義烏劉應龜。非零篇賸語。散見
他書。後人欲求其隻字。不可得。此予錄詩意也。夫
詩在天地。如山花野草。所以點綴春光。不然。則兩
間無色。詩各有長。譬一草一木。各有臭味。不必拘
於一律也。

徵獻續纂

除祝子堅外。皆予素交。書成例。難收入。畧舉其
概。句不在多。倘得如陳元龍品題。數語突過
大篇矣。

周殷士如方珪圓璧人倫師表交遊風義古道照顏

康諱敏求趙雲參蘊真抱素含英咀華諱筠廩生所著

集唐翼修徧贊耆宿履蹈端方胸懷開廣門標戶列

著述不倦諱彪兩任訓導所著有身易父師吳以敬

在狂狷之間傾貲市義陋巷安貧卓立千仞峯頭可

與呂雲君把臂同行諱尚修丁巳舉人祝子堅好談

經濟祖尹規商黜浮崇實濟時碩畫可見施行諱石

所著有希燕說徐完石品行文章皆堪師表身為廣

文口不言利筋力未衰拂衣高蹈諱琮戊午科舉人

河先生亟稱之程嗣音學博才瞻老好著述自命不

所著有詩集

朽。文。集。又。有。戰。國。策。註。皆。有。刻。應。舒。哲。恥。受。呵。斥。藥。

筆。不。試。醇。德。清。才。在。隱。彌。彰。弟。子。歸。心。圖。像。瞻。瞻。歸。

郁。廩。生。所。著。有。四。書。徐。伯。德。品。行。端。方。胸。懷。慨。爽。抗。

微。音。以。上。皆。永。康。人。年。登。九。十。廩。貢。牛。吳。毅。公。天。懷。曠。

逸。強。詭。博。聞。介。不。累。物。和。不。矜。方。獎。誘。後。學。至。老。不。

倦。李。儼。定。少。而。盡。孝。生。不。知。家。中。有。米。菹。事。隨。意。揮。

灑。至。於。食。貧。彈。琴。自。娛。其。學。與。紫。陽。迥。至。其。人。品。無。

論。異。同。莫。不。心。服。有。四。書。毛。詩。說。著。盧。秋。生。中。富。好。

施。合。族。均。霑。舟。梁。道。路。創。新。補。舊。日。久。不。倦。予。詩。曰。

臘。天。舉。火。念。貧。寒。風。雨。號。窓。愁。旅。客。以。上。皆。東。陽。人。

方冠山。襟貌古心。閉門學道。其遠祖巖南集。散失千

里尋訪。如孝子尋母。四明鄭南溪重其為人。為訪諸

所著有浦陽儒學淵源錄。餘不一種。鄭一上。有義門遺風。承父遺命。捐

上腴。有畝入學資。諸生秋試。不愧孝廉方正。諸生傳

呈禮部。其父得入西學。巡撫以其越呈決杖。

金華徵獻畧卷之十三

鶴渾王崇炳虎文氏撰錄

門人黃廷元殿選較訂

東湖金律孔時編梓

政績傳

張敦

漢張敦字伯仁、烏傷人、今屬浦江、漢時爲諸暨令、海寇二百餘人、剽掠爲患、敦平之、遷重泉令、民悅其化、拜車騎大將軍、

陳修

〔梁〕陳修字奉遷、東陽人、起家爲穀城令、遷合浦太守、大著治聲、常以喪紀之法、遍書於鄉、使民知習、卒於官、合浦民護喪歸葬、

韓晏

韓晏字德茂、東陽人、初舉孝廉、起家爲永寧令、遷張掖太守、後爲河南尹、所至以仁惠稱、嘗遇盜於途、抄掠俱盡、行數里、見車下遺絹數縑、盜物也、追還之、盜感歎、悉還所掠、晏歷官不知何代舊志載三國吳人

蔣邵

蔣邵字景倩、浦江人、爲益陽令、遷江撫二州刺史、擢

虎部、民蒙其惠、轉交州刺史、

傅柔

傅柔、字仲席、浦江人、爲宣城令、無爲而治、謳歌載路、

遷鄂州刺史、

蔣傳、洪邁列之漢、宋景濂云、洪州漢名部、而撫係焉、鄂名江夏郡、無稱洪撫

鄂三州者、及隋平陳、乃始制之

劉滂

宋劉滂、字德霖、武義人、與浦江梅執禮、同遊學、士多

下之、號東梅西、劉登大觀己丑進士、知新昌縣、俗嗜

鬪、令到、輒病去、滂臨以誠、未幾稱治、旁邑訟不決、多

請就滂決之、蔡京與滂祖爲布衣交、滂至京師、京喜

故人有孫、除勅令所刪定官、將托以腹心、會常璩題
詩屏間、京疑其訕已、屬滂踪迹之、且遷官、滂曰、此事
胡爲及我哉、京聞之不悅、滂亦拂衣去、坐是不調者
十年、建炎中、上問人才於近臣、汪藻等薦滂可用、起
知建昌軍、舊守威權不立、兵習驕悍、邀求無度、滂至
一裁以法、兵或持戟入市、掠人物、卽拒者、刺傷之、滂
捕繫、兵遂爲變、滂及母妻皆死焉、滂好學善文、與人
交終始如一、有急則傾財赴之、居官嫉惡如讐、毅然
不可奪、以及於難、朝廷旣誅首亂、用御史言、贈朝請
大夫、

論曰、德霖托契權臣、獲蒙私顧、涅而不緇、可謂鐵中錚錚。執法遇害、惜哉。

樓焯

樓焯字仲暉、永康人。政和間進士、歷官尚書考功員外郎。高宗在建康、焯言今日之事、當思古人量力之言。察兵家知己之計、力可以保淮南、則以淮南爲屏蔽。權都建康、漸圖恢復、力未可以保淮南、則因長江爲險阻。權都吳會、以養國力。於是移蹕臨安、擢右司郎中。時銓曹患員多缺少、議自倅貳以下多添差。焯言、光武併省吏員、今縱不能損所素有、又安可置所

本無紹興二年召朱勝非爲侍講罷給事胡安國、
與程瑀等言勝非不可用胡安國不當謫皆落職七
年、
焘官起居郎言監司郡守係民甚切宜令侍從官
各舉資序可任監司郡守者一二人詔從之九年、
焘爲給事中兼直學士院和議降詔肆赦文出焘手除
端明殿學士簽書樞密院事繼命往陝西宣諭德意、
焘奏京城統制吳革死於范唄知環州田敢成忠郎
盧大受死於劉豫乞賜褒恤以表忠義至長安會李
世輔自夏欲歸朝焘以書招之世輔乃以二千人赴
行在賜名顯忠以覲老求歸省於明州命給假迎侍、

仍賜金帶十四年。以資政殿學士、知紹興府。過閩人見、除簽書樞密院、兼叅知政事。仍爲李文會詹大方劾罷、與祠卒。賜諡襄靖。

論曰。襄靖論遷都。則陰附汪黃。成和議。則顯贊秦檜。儒者所不齒。鄉評所羞稱也。然賊過之後。易於張弓。宋室中覆。無論高光之業。卽欲繼武晉元。保守江南。傳世數葉。亦必有知治體者。經營其間。不然。柄國無人。雖或建國。金鼓一震。便同瓦解。如襄靖者。力足宣勞。豈可輕非哉。

范滂

范溶字茂寬、蘭谿人、賢良浚之兄、以祖任官司理士、
曹歷知歷陽武康、權通判饒州、溶練習吏事、決獄詳
明、三爲刑官、再治邑、皆稱平恕、在潭淵日、有毆婦人
傷甚、四十九日而婦人死、曰破骨法、限五十日、而創
傷卒不踰月、今四十九日矣、脫不破骨、能無冤乎、驗
之、實正創傷、遂得不死、武康父老、訴前令定物力、溢
故數錢千百十餘萬、科輸不前、欲更之、吏白、板已上
郡、須三載可改、曰是困吾民、一日不可、可三年乎、立
除其十之二、繼列其弊於郡、追易前板、民以爲利、在
饒、值旱徧走郡祠、禱雨、得疾而卒、

徐良能

徐良能字彥才、蘭谿人、紹興進士、歷知宿松、安吉二縣、皆有惠政、其在宿松、撫流亡、勤勸課、前令以土產供餽遺、私增俸給、盡削去之、吏以舊例告、良能曰、此職也、無污我、及爲安吉、遇水災、除賦賑饑、民乃繪像祀於學宮、刻石以紀其政、去之日、衆爭致贐、一無所受、待次於家、醫產給食、歷官殿中侍御史、給事中、封蘭谿縣開國男、除龍圖閣待制、以終、良能爲御史、凡所開陳、皆當上意、獨張說以戚里簽書樞密院事、衆皆切諫、良能獨無所陳、陳同甫以書譏之、而治安吉

時民爲漁樵耕讀之謠。至今傳誦。漁者曰。市價魚平。酒亦平。賣魚買酒快予情。扣舷笑指一溪水。若比官清。官更清。樵者曰。清曉拂烟上翠微。一肩薪爇趁晴歸。公庭不到私無事。靜掩柴門結草衣。耕者曰。濛濛春雨一犁深。一塊膏腴一塊金。喚婦呼兒荷鋤去。日來官長又親臨。織者曰。北舍西家巧鬪機。阿姑嬌姐共裁衣。勤勞經緯官無調。保障吾民信不私。

論曰。今之守令。居官不聞政聲。去任各有治譜。襦之謠。盈編累軸。曾不數年。灰燼一盡。珉玉相雜。久而見真。漁樵等作。今日大有夢以歲久不滅爲

貴。

喬夢符

喬夢符字世用、東陽人、從呂祖謙學、作不欺論、祖謙
奇之、登淳熙二年進士、知徽州歙縣、有大達當水衝、
居人歲苦霖潦、夢符築堤鑿渠、遂免水患、因號喬公
街、嗣守潮陽、宰相薦士十九人、以夢符爲首、改六院
差遣、等遷大理正、奉旨訊郭倬獄於宿州、獄平、除監
察御史、尋卒、著西峴類稿十卷、子幼聞、紹定進士、官
宗正丞、孫侶孫、官朝議大夫、徹孫、官至承直郎、

石範

石範字宗卿、浦江人、師事呂祖謙、登紹熙進士第、始
爲奉化尉、饑民將爲變、範賑之、不誅一人而定、海寇
爲害、設計捕殺之、繼知婺源縣、有月椿錢二萬、皆取
諸民、民患之、範請蠲其十之二、權通判袁州、攝州事、
峒獠竊發、袁當其衝、範閱民兵、廣儲蓄、修守備、威聲
甚震、獠不敢近、官至南外宗正丞、範守正不撓、或
勸其謁權貴、美官可立至、範謝曰、吾儒者、改官爲縣
當耳、何以僥倖爲、士論多之、弟籌亦能文、登進士、官
吉州司理、

論曰、士而不學、學而無師、猶種樹無根、思爲棟梁、

以資世用難矣。吾婆先賢盛於南宋。其文章政事。卓然有聞於後者。皆東萊弟子。不然。則學於同甫。悅齋者也。

潘燾

潘燾字無愧。蘭谿人。以祖任補官。仕至中大夫。直秘閣。廣南東路經畧安撫。兼知廣州。以終。其權知邵州日。朱熹安撫湖南。與周必大聯章薦之。稱其以學問持身。以文雅飭吏。不鄙夷其民。政先教化。崇學校。祠先賢。民有訟。諭之以理。事至敏於決遣。囹圄屢空。徭寇犯邊。處置得宜。民用安堵。其爲大賢所稱如此。燾

祖某登大觀進士官至朝議大夫光祿寺大卿直秘閣鄉里皆稱其賢父慈明登紹興進士官至秘書丞荆湖南路轉運使其知江州時嘗建周濂溪先生祠朱子爲作記鄉人徐畸稱其文章議論卓然可紀吳師道亦稱爲鄉之名士一時祖孫父子舉進士登仕籍者將二十人

論曰吾婺諸大姓非以厚德起家則以詩書開族若使畜積不厚譬之朝霜見日卽消福澤之來可幸致哉

樓大年

樓大年、字元齡、義烏人、學於徐僑、登嘉定進士、曆官中外、曾監行在會子庫、同官皆以侵欺被劾、唯大年獨免、改知南昌縣、治先教化、建利去病、若嗜欲然、民夜行、爲讐家毆死、事覺、賂其甥、來就辟、甥自陳殺民狀甚悉、大年疑之、亟命丞往驗、丞受賕、使焚屍以滅跡、大年怒、聞於府、屬錄事覆實、錄事復受賕、議如丞、大年正色抗辨、錄事引去、上之臺、令觀察推定重讞、事始白、民敬之、爲立生祠、遷通判吉州、提點刑獄、李廸以大年廉慎、命錄一道繫囚、大年隨輕重而疏裁之、抱成案就廸言咸聽、未幾、攝郡事、江東大姓查氏

以父遺書據幼弟資產幾六十萬弟長訴之官歷二十年不解廸曰非清吏如大年者不足以究此事下大年舉張詠決子壻爭財故事爲例命歸其弟人以爲允歷官朝奉郎年七十卒於任大年襟度灑落如晴空皎月一塵不染在官洞察民隱脫理有未安必反覆沉思終夜不昧所見一定屹如砥柱雖壓以權貴之勢不爲之屈無愧古循吏云

論曰予自少至老見鄉邑富人爭財者一訟則動經數年官以所入多寡分左右之祖直至財盡之日方爲息訟之年未見據法裁決如樓公者彼前

二十年不決之有司殆謬於之爲政者乎。

許子良

許子良字肖說、東陽人、幼誦書、通經史、精文辭、尤長科舉之學、抽關啟鑰、得言外意、試詩賦、魁江東漕司、嘉熙間、登進士第、年五十餘矣、歷任皆以廉能稱、嘗知晉陵縣、前令不良、版籍紛亂、官賦多放失、諸司督逋、吏竄匿殆盡、子良爲稽逃亡、考隱漏、催科定繇、條緒燦然、冉知都昌縣、初至、庫藏赤立、子良節縮浮冗、兩年之間、供輸遂有餘、轉承議郎、通判江州、差幹辦行在諸司糧料院、輪對稱旨、有旨、俾閱滯獄八十餘

子良爲繙案一一讞之凡累歲不引決者一旦曲直皆白由朝奉郎轉朝散郎知台州時弊蠹相仍負上供錢三百餘萬子良節縮如都昌凡典例所宜得皆謝去居半載郡計裕如子良聽訟據案與兩造相爾汝以察其情情得卽決遣之吏袖手具文書而已同僚與吏無所容其私皆忌之吏白每歲以錢折米二萬斛子良不許而禁卒有不便者於是噉其毆吏以撼之且相與出危言子良知墮其計卽委印去事上降兩官賈似道開闢荆湖辟主管機宜文字事有難處他人不能寘筆者經子良議定人無異辭景定庚

卒於鴻川年七十五。子良條然如鶴。風措孤窻。性
清介不偶。俗與人交。極尙風義。赴急扶顛。不避斧鉞。
剛腸嫉惡。或面折至發赤。世樂軟媚。皆望風嚴憚。不
知其襟懷夷坦。毫無留滯。居官務抑豪強。凡武斷於
鄉者。悉刑之事。其長懇懇納忠。縱嬰其怒。不避知部
昌日。方岳來爲郡。面目嚴冷。人不敢仰視。子良數爲
抗辨。無所屈。岳初怒甚。已而察其忠亮。反薦之。子良
生平奉養甚儉。雖列膺仕。蕭然如寒士。客至。啜茗清
談。饑則煮餅而已。黃夢炎云。子良爲人。其平如砥。其
直如矢。其堅剛如百煉金。其孤峭如危壁千仞。江萬

里云。蒼苦勁凝。不知四方復有何人。文學政事。當推子良爲第一。吳子良云。鏡明而衡平。子良以之。無愧於清白吏王萬者也。一時推重如此。

論曰。予作許子良傳。皆取宋潛溪原文。而節縮之。宋氏以爲子良從似道辟。爲白壁蒼蠅之玷。而以知人則哲。惟帝其難爲解。予曰。不然。似道出鎮之年。卽宋室將傾之日。同舟遇風。當竭力求濟。豈可以操舟之不善。委之去哉。金華志竟削子良。迂矣。

黃夢炎

黃夢炎。字子錫。其先由浦江徙義烏。曾祖中輔。以風

節著聞、當秦檜柄國、和議旣成、士大夫皆歌詠太平
中興之美、中輔不平、作題太平樓詞、譏切之、爲時所
傳誦、詞曰、瀝血爲詞、披肝作紙、片言誰讓千秋、快磨
三尺、欲斬佞臣頭、自恨草茅無路、望九重如在瀛洲
興長嘆、無言耿耿、空抱濟時憂、休休休、真可慮、才
如李廣、却不封侯、奈伯郎斗酒、翻得涼州、盡道邊庭
卧鼓、誰知坐老貔貅、憑誰問、籌邊未建、先建太平樓
夢炎博學能文、入荆湖制幕、以掌故、准備差遺、平反
盜公庫銀、寃獄得釋者數十百人、入淮東制幕、主管
機宜文字、建議蠲放屯租、邊民賴以安業、出判平江

府、擢節浮蠹、以代民輸租、白免淮西總領累歲所索名錢、民力以甦、咸淳初、除司農寺丞、輪對、力陳時弊、請減浮費、乞戒宴私、度宗嘉納、除樞密院編修官、累遷戶部左曹郎官、仍兼編修、與時宰不合、引年以朝、請大夫致仕、題所居曰桂隱、有詩文十卷、

趙大誦

〔元〕趙大誦、字敬叔、浦江人、起家譯曹掾、調泉州錄事、大盜起寧都、泉之無賴子嘯聚應、謀攻城、大誦設柵禦之、盜乃去、轉龍溪尹、俗尚鬼、作石屋奉紫衣神、黥民戶賦牲犬以祭、因爲利、大誦投神江中、移其石、修

孔子廟邑大姓怙勢殺人郡守受賕出大訥抱案詣府以爭守怒中以他罪改永春俄遷永嘉永嘉計口賦塩民以爲病大訥建請令富商轉售之瑞安猾吏僞爲官書誣平民盜販民自殺者三人府下大訥訊之大訥盡得其奸狀釋平民而抵吏罪徙臨汀州城枕大江水暴岸善崩大訥列植巨木先以箕芒殺浪勢然後實土以石甃之岸凡數千尺得不壞改知永新州州民素豪勢出守吏上大訥至皆畏服不敢動鵠湖羅陂皆羣盜藪每爲過客患大訥以計剪其渠魁餘皆奔散時鄉飲酒禮久廢大訥首講行之觀者

悅服。在官二年。告老大訥。性剛直。不畏大吏。屢典劇縣。皆有能聲。隸卒無敢出鄉。宿猾元豪。相戒遠遁。數平反冤獄。民爲立祠。時或行鄉。父老携子弟聚觀。曰。此吾趙侯也。其爲人愛慕如此。

論曰。涖官有四美。曰嚴。明。清。勤。不嚴。則奸猾得志矣。不明。則柔懦受冤矣。而必以清爲本。以勤爲用。不然。包苴夜入。則白黑倒置矣。興居不時。則百務叢脞矣。大訥在縣。歷任有聲。豈非得此四美哉。

蘇友龍

蘇友龍。字伯夔。遲之孫。遲。蘇轍子。爲金華守。子孫家

馬友龍學經於許謙，以才推擇爲府吏，入閩海爲差。奏汀寇至臨漳，長吏欲籍民爲兵。友龍曰：「民不知兵久矣，籍之必擾。」吏曰：「計將安出？」友龍曰：「吾知所以處之矣。」閱兵籍，得放逸者二千，使帥以擊賊，獲其魁。賊乃却，轉江浙行省書吏。紅巾犯杭州，官吏多逃，惟參政樊執敬坐堂上，誓必死。友龍說曰：「明公以身死國，義則得矣。如一城生聚，何今城中衆不下數十萬？公庫金帛以萬計，與其資盜，曷若募民使戰？」執敬不從。上馬迎敵而死。友龍與榘、李樞謀以蘓、李署號，召民殺賊，計首受錢，民持刀爭奮，獻馘盈庭。未幾，辨章兵。

至破賊走之。友龍絕口不言功。滿考授蕭山尹。縣爲
吳越要衝。師旅經行無虛日。誅索焚芻少不愜。則恣
侵掠。友龍儲峙旣充。有犯者擒。置於法。會歲儉。弛湘
湖之禁。以利民。不足發常平倉以賑饑者。僚屬難之。
友龍曰。發天子粟活天子民。何不可。倘有譴責。吾自
受之。民賴以生者數萬計。未幾陞行省都事。叅政石
末宜孫分省處州。宜孫賢而工詩。與劉基甚契。處州破。宜孫死難。請友龍與
俱。友龍勸其禮賢士。輯流亡。招徠群盜。衆心翕然。已
而明師至。浙東皆附。怨家告友龍長子仕閩。抗命坐
徙滁陽。遇赦還。卒於家。

論曰。友龍膽識過人。遇事能斷。洞中機宜。大才小試。未罄所藏。惜哉。

劉辰

明劉辰字伯靜金華人。慷慨負氣節。善談論。喜功名。明太祖下婺城。辰首上謁。署爲典籤。奉使方谷。珍飾二美姬以進。辰峻却之。洪武間。以監察御史擢知鎮江府。興廢舉墮。勤於其政。郡有濱江田八十餘頃。歲久淪沒。仍責賦於民。請於朝除之。京口閘廢。舟楫不通。漕運轉新河。江陰二港出江。多阻風濤。乃自京口至呂城百二十里。濬淤塞。修閘壩。順水勢。爲出入。公

私便之。漕河源淺易涸，恒仰水練湖。湖有三斗門，久廢，亦修築之。於是漕舟既通，而湖下之田亦稔。宋名臣宗澤墓在丹徒，荒穢不理，墓田據於民。辰爲封樹，而復其田。永樂元年，召修高廟實錄，凡當時戰伐克捷之功，宿將舊臣，有所不能盡記者，歷歷言之。聽者如目睹其事。考之記注，無不懸合。書成，超拜江西布政司左叅政。雨澇江溢，饑民爲盜，富室多懼其患。檄邵邑勸富民出粟以貸饑者，官爲立券，期以來年償本，蠲其役以爲之息。民遂安。南贛諸府荒田糧六萬餘石，有司歲抑取於民，民不堪命。辰悉疏請蠲其額。

官至刑部侍郎。年七十八，疾作，給驛還家，卒於毘陵。驛舍辰爲人直諫多聞，有古節士風。所著有國初事蹟、子徵博覽能文，著金華名賢傳。

論曰：鄭清逸云：「予嘗過鎮江，父老言辰治行卓卓，可稱。夫持論於後世，不如當時之言；推美於同鄉，不如治下之口。如劉公者，洵古良吏矣。」

吳履

吳履，字德基，蘭谿人。景奎子。少受學於聞人夢吉，俊邁有濟世才，通諸史，爲文願學司馬遷、班固，好書工行草。明祖定江南，有司舉於朝，爲南康丞。南康俗悍，

民以丞儒者易之德基自數月皆周知其情僞有所發摘一縣驚伏德基乃更以寬撫之民王瓊輝仇里豪羅玉成執其家人笞辱之王成家怒集少年千餘人圍王氏奪家人歸且縛瓊輝至家笞之幾死乃釋去瓊輝兄弟五人庭訴辭指出血誓與羅氏俱死德基念成獄當連千餘人勢不便乃召瓊輝款語勸之且示以禍福瓊意稍解乃捕操筆者四人於瓊輝前杖數十血流至踵命羅氏對瓊輝引罪拜之兩家皆感激曰吳公活我皆願有所獻却止之縣令周以忠初至召民轉輸至郡躬至鄉督之一民不受役令笞

之民大誦而走、令其怒、吏卒思株連以營利、以語動令獲六七人下獄、方往捕不已、民大駭、德基梃獄門、遣出之、令怒曰、民辱我、丞乃釋之、何意、德基曰、犯在者一夫耳、鄉人何罪、且法天子設、豈爲君釋怒乎、令慚乃已、在南康爲丞六年去、知長砂之安化、去三月、他吏用法急、民乃作亂、大師討平之、死者過半、民泣曰、使吳君在、寧有此禍乎。安化隣古三苗、土豪多糾民爲兵、旣盡降萬夫長易俊原素勇、與麾下數十人遁入山谷、保險自固、江陰侯吳良承詔討餘寇、檄旁縣兵且集、德基曰、易氏未有反狀、激之恐生變、願以

計致之。侯曰：令之言是，吾待子而後決事。德基乃屏吏卒，步入山中，誘俊原出，縛送京師。事平民安堵，無擾越三歲，入朝，擢知萊之濰州。民畜官驢四十匹，萊守核其孳息，與籍不合，欲按籍徵償。諸縣皆勒民買驢，德基獨否。守怒曰：濰不償驢，何也？德基曰：民實不匿驢，惡可徵償？國家新造，富極海內，爲吏宜宣布德澤，寧少數匹驢耶？守語塞。諸縣償者，皆罷之。山東民願以牛羊代秋稅，官從其言。德基曰：牛羊有死瘠患，不如納粟便。已而他縣牛羊送陝西，驅走二千里，多道死，民皆破家，而濰獨完。守令役千人，部送隣縣牛。

德基列其不可。曰有牛家送牛。雖勞不怨。使人代之。牛死誰當代償耶。力爭不奉命。德基居濰二年。會改濰爲縣。召還。民如失父母。德基爲吏。不立威名。以愛民爲先。尤重獄事。凡有訟。直之而已。不忍置民於獄。故所至皆有聲。

論曰。宋潛溪云。德基爲政。固世俗能吏所竊笑。然誠心愛民。如保其身。衆安其政。去則思之。古所稱平易近民。豈弟君子。非德基之謂耶。

諸葛伯衡

諸葛伯衡。蘭谿人。秉性清介。持名節。鄉里咸推重之。

洪武初以薦授北平雜造局大使不以家累自隨出入無車馬遇雨草履行泥塗中遷趙州吏目州有建峯廟廟有青蛇凡入人家必有禍巫因以禳祓營利伯衡入廟殺蛇罪巫者民以不惑以學士董倫薦召問治道對以聖明之世紀綱正而法度修民皆安業但廉耻之道輕耳上大悅擢陝西叅議以道途遠近定轉輸之法民甚便之改廣東叅議卒於官金華杜桓爲作傳稱爲清修直諒之士

邵玘

邵玘字以先蘭谿人登永樂丙戌進士擢監察御史

歷江西福建按察司使、陞南京都察院左都御史。時宣廟患京職多曠，欲舉察之，思得清忠不阿之人而難其選，特任顧佐於北。故特有此命。玘居家有孝行，在官以威嚴憚吏，遇事善斷，所至削妄費黜貪庸，能舉其職與顧佐齊名。一統志：明史竊俱稱其爲人。

李敘

李敘，字秉燹，東陽人。永樂中，由鄉薦入太學，爲祭酒。胡儼所器重。宣德初，試授監察御史，嘗奉命錄囚，辨交趾俘囚三十餘人，釋之。出巡淮甸，累劾大臣中貴所爲不法，擒豪右范端操等十餘人，置之獄，汰去貪

墨吏雖親故不少容按泗州有老嫗鬻子以供權貴
烙馬叙語責權貴止之中使取珍禽異獸至淮叙陳
其害悉報罷上嘗問都御史顧佐諸御史盡職者幾
人佐首以叙對歲周將代叙獨保留淮上三年及還
朝權貴搆以事下獄會八百車里二番讐殺累遣廷
臣招撫不服朝議推叙乃左遷行人奉旨徃諭皆納
欵上喜令復前官權要復誣讟之謫戍大同天順改
元赦還復職遂乞致仕歸居林下二十年以高壽終
所著有困菴集南征紀行錄

陳俊

陳俊、字俊民、東陽人、永樂乙未進士、除監察御史、巡按南畿、劾賊吏、革宿弊、郡邑肅然、陞應天府尹、以嚴峻繩下、吏有犯贓者、或杖殺之、處同僚、不阿以私、嘗曰、吾不能自立清流、然隨波汨泥、亦不爲也、後卒於官、俊官京尹、不爲卑矣、在臺能振風紀、府志有傳、且載其墓、其時之鄉評可知矣、東陽新志、不爲立傳、

盧庠

盧庠、字世昭、東陽人、永樂辛丑進士、庠性剛執、授監察御史、巡按遼東、練兵訓士、甚著聲績、正統間、陞右僉都御史、巡撫山西、時羌部進貢千餘、至大同、日費羊三百餘、俱賦邊民、庠奏於每歲糧折銀買辦、民甚

德之鎮守太監郭敬佑勢翫法。睿抑之。遂誣以擅減供給。上親訊之。睿自陳得直。陞右副都御史。總督陝西邊務。法令嚴明。上下畏服。尋引年歸。

論曰。民命在守令。守令之賢否。在監司。御史者。所以舉劾監司。而隱操黜陟者也。御史不舉劾。監司得容其不肖。以守令爲庄庫。民欲治可得乎。明之初年。吾東在臺諫者。皆著風采。亦可以觀氣運矣。

何士英

何士英。字子文。東陽人。洪武中。以人材授知平涼府。居官清慎。親老乞歸。忤旨。左遷廉州判官。亦以廉謹

稱、仍乞歸、永樂初、復起知平涼、民皆相慶、如孤兒之
重得父母、會主者較倉儲、虧數千石、士英方自劾、民
爭輸之、如數、考滿去、父老遮留、載道、安府以詩送行、
有、前任只多琴、與鶴此行惟有影和身之句、御屏記
廉吏十八人、士英居首、陞兩淮都轉運鹽使、先是民
苦督課、部差所至苛擾、及歲課孳生馬駒、賂納不支、
士英一切奏罷之、遭母喪歸、吏部尚書蹇義以其廉
能、奏欲奪情、堅辭終制、起復、涖前職、始終一節、致仕
歸、卒、士英在淮、因寺僧浚井、得蘭亭石刻、以歸、識者
擬之定武本、子孫相傳爲寶、

論曰、送行頌德、多諛少實。至其真者、不遇其人、則詩人必不肯道。有可道之人、而不遇詩人、又不能道。何運使得二語寫真、遂使千古傳頌。然非運使真廉、又何能發此詞哉。

龔永吉

龔永吉、字天民、義烏人。龔泰子。泰死、靖難時、方四歲、母傅氏育而教之。永樂庚子、舉鄉薦、授職方司主事。陞武選郎中、以事謫戍平涼。時北邊告警、用兵部尚書王驥薦、爲佐軍、從討破之。尋詔驥南討麓川、緬甸、乃征苗蠻、孟養等處。永吉從出師、皆有勲績。還陞大

理少卿、歷兵部右侍郎、調南京禮部、改大理寺卿。永吉居官清介、慎密、謀慮深遠、屢裨征伐、囊無所畜、宣廟製秋水圖賜之。官大理時、休寧土豪孫志靖、謀殺項士和、而奪其妻、當事受賕、經十餘年不決。都御史押送詳審、永吉疑之、晚過太平堤、忽隻鷺來止輿下。揮之不去。永吉曰、爾苟有冤、可隨我至門。及門而鷺不見。永吉曰、此非士和之冤耶。蓋義烏呼鷺爲和云。次日閱卷、遂駁回差御史勘實。卒正其罪。成化改元、上疏乞休歸。年七十三。卒。賜祭塋如例。論曰、龔氏自忠愍以後、累葉朱紫。文章政事、赫燁

一郡與明代相終始難矣。

謝愷

謝愷字舜卿義烏人由貢監任四川敘州府推官。操履清潔治獄明允弘治戊申蜀大歉奉勅賑饑兼理瀘州等處多所全活時盜賊縱橫招來安集民大感悅撫按交薦於朝命甫下而卒於官士民哭泣如失父母旅櫬東歸惟救荒誓却金圖勸民詩籠雞說數篋而已所著有石樓山稿愷卒後浙江提學僉事陳輔叙州人行文府縣稱愷爲推官時一廉如水其介如石文章足以經世政事足以及物士蒙其教民被

其澤一旦遠邇百姓垂泣至今有家祀以報恩者遂
咨詳部入鄉賢議謚清惠仍建旌異坊於當道今在
義烏廿三里街

論曰居官者瘠民以肥子孫民則瘠矣子孫未必
肥也甚且求瘠不得明時謝公同鄉有官御史者
滿載而歸相傳其子與他公子爭妓擲金於江以
賭勝不一代而田宅盡歸他人謝公介介得一士
焉竭力表彰揚名顯姓之職一身任之噫若謝公
者真善貽子孫者矣

王坡

王坡字舜耕，東陽人，居嘗好學。弘治辛酉舉於鄉。時章懋爲國子祭酒，復從受學。授江西浮梁令。邑在萬山中，多盜，坡嚴保甲，阨險要，地方以安。景德鎮內監虐取民，兼上官和買，里胥匿價，爲害特甚。坡親閱審戶，編四季文冊，按季均輸，民乃不病。邑多虎，傷人甚衆，田爲不治。民有嫁女者，方將登輿，虎突入稠人中，啣其女去。民訴於官，坡乃齎宿牒於城隍神。虎忽夜入城，衆格殺之餘，悉就捕。民因爲搏虎歌。又值旱，坡素服苦履，自暴炙，燭中三日。大雨如注。民因爲作甘霖頌，旣述職，以疾辭。民訴於當道，懇留，因勉至任。未

幾歸、坡嘗言爲學以誠敬爲涵養本原之實地。以五經四書爲開明心術之根本。以綱目性理爲應事接物之準繩。其爲治則抑彊暴。扶良善。敦彝倫。崇禮讓。一本於愷悌之自然。而天道亦爲之默轉云。論曰。世有正學。然後有善治。舜耕誠心愛民。至理開感。天人協應。爲時良吏。非所學豫哉。

蔣瑜

蔣瑜。字純卿。東陽人。登嘉靖丙戌進士。授鄱陽令。其邑濱湖。湖水泛溢。則壞田畝。敗禾稼。瑜爲築堤延袤數百丈。謂之蔣公堤。歲饑。小舟載米粟沿門賑之。後

以御史巡按楚中，有劇盜數百，越獄斬關而出。瑜授計，一夕擒之。又以歲歉，奏免田租之半。民視頌焉。瑜少貧，爲道士，作祈晴疏，有「魚遊木表，人渡高岡」之句。邑令見而奇之，命之讀書，且以俸錢資之。不數年，遂成進士官冢史，政績顯著，人皆服。邑令之識鑒云。

盧仲佃

盧仲佃，號懷莘，東陽人。嘉靖丙辰進士，任晉江令。倭至，仲佃建議城安海，居民憑城拒守，得無恙。改調福安，邑新破，仲佃請兵五千倍道而進，繕治城壘，招撫流亡。倭至三洋，男女十餘萬，阻水不得渡。仲佃以漁

用濟之、已逼城、城中人創前禍、爭先逃避、仲佃令曰、
吾與若同死守、婦女聽出城、男子出者、則左右趾民、
乃止、相持三日、夜倭引去、臺使者上其事、陞兵部郎、
出守成都、值白蓮盜起、愚民罹重辟者、百數、仲佃曲、
爲寬宥、轉惠潮副使、調湖湘、楚王薨、武崗王謀署府、
事與王戚共盜、內藏相訐奏、仲佃按王戚於法、奪武、
岡府事、當事不懌、調叅江右、按治南昌、寧州柯氏民、
相仇殺、寧守張其事、以剿逆請、仲佃斥之、柯卒解散、
守得罪、仲佃陞廣東布政使、會有以註誤謫者、心疑、
仲佃與前寧守比而搆之、遂左遷、備兵惠潮、時流民、

據山寨爲訐兵燹相尋。灾癘大作。仲佃諭降諸賊。積勞目瘡。卒於官所。仲佃爲人性冲淡。重然諾。好施予。家居儉約。終身不畜姬妾。所著有何莫軒集數卷子。洪春。洪夏。洪秋。皆有名於時。

論曰。懷莘公至福安。衙署摧破。海寇外逼。從者皆哭。而公意氣慨然。卒能活一邑之民。夫官求富。則民多貧矣。官求生。則民多死矣。准官行政。無以有已。事當危急。豈全家偷生之人。所能勝任哉。

王乾章

王乾章。號震所。東陽人。嘉靖壬戌進士。以中書舍人。

轉山西道監察御史、巡視蘆溝橋、時宛平令以疆直忤中貴獲罪、御史顏鯨抗疏極論、坐奪官、乾章疏繼之、留中、疑叵測、會閣臣申救得免、以離政按山東、以廉稱、遷四川按察司僉事、訟獄平、重慶民有悅隣婦挑之者、婦礪錐椿其腹死、吏以未成奸抵罪、乾章曰、婦致死拒奸而加之辟、是爲宣淫者幟也、立釋之、郿城圯、以贖、醵繕築、旣就而民不知、於其隙、泐書院簡、青衿督課之、所甄拔皆相繼取科第去、政聲甚著、萬曆改元、轉江西布政司叅議、分部九江、盜何鳳等恣寇抄、以計散其黨、而巨魁就縛、坐建邸失印、去官、仍

起福建按察司僉事、直指使、屬之慮囚多所開釋、颶風作、福安環海、民溺者數萬、出金掩骼、爲文弔之、又發粟賑流殍、擢雲南布政司叅議、告老歸、乾章積學工詩、所在登臨嘯咏、訂五經同異、所著有浪遊集、子嘉亮、以鄉薦官、常德府太守、亦能詩、

王嘉忠

王嘉忠、字全吾、乾章侄、登萬曆鄉薦、官平遠知縣、奸民以白蓮教惑人、置之法、富家爲仇誣入、立雪之調、繁澄海、其治如在平遠、蓋繩民以寬、而獨嚴於盜、凡僞請聯袂、結黨之奸、治之不貸、浚三川之流、築石梁

三民利賴焉、其俗於上元中元日、男婦跨彩橋、禮佛、民因之營鏹錢、少年艷歌謔浪、無所不至、嘉忠立毀之、懲首事者、著爲令、修建學宮、請於所司、增補弟子、員歲爲常、以薦授評事、所申救、凡若干人、出知興化府、至境、卽取軍民利病、榜陳之、巨豪彭某、以貲橫鄉邑、侵奪人妻女、喜以奇禍中人、官府逮不至、至或以賄免、嘉忠廉得其實、立斃之、肆於通衢、觀者欣躍、陞蒼梧兵備、部吏以故事請曰、無事而擾民、不如已、諸文網多踈濶、而於所轄貪墨吏、不少縱念、以此拂上官意、告歸、嘉忠性落拓、不事家人產、於雅俗玩好、無

所嗜、衣履不敝、不更爲、而好施與、重然諾、持空言以責券者、必應之、終身儉約弗悔、

趙賢意

趙賢意、號如城、東陽人、萬曆乙未進士、官福建邵武司李、善剖決、案無宿獄、時妖黨晁天王結海寇爲患、臺下所司議、同官相顧莫發用、賢意策使壯士入賊、徒中以計擒之、散其餘黨、一境肅然、政最陞南曹車馬司郎中、盡去草場宿弊、著爲令、轉北部營繕郎、論鑛稅之害、不報、又論破積例、節浮費、及內使擾民諸事、又不報、出知徽州、未上、陞安綿等處兵備總爲二

州要衝。兵籍皆虛。額賢意至。一一稽實。且不時簡閱。而軍聲一振。時巡視要害。察土俗。撫流移。積勞成疾。卒於官。賢意爲人方正不阿。而性善容納。好獎掖後進。所品藻皆不爽。曾典粵東試。所拔皆俊士。或餽以金。且示當道意。冀有所提拔。峻却之。趙氏世多簪纓。而居官清正。得鄉曲之譽。惟賢意爲最。孫衍登康熙癸丑進士。爲文章有名於時。

馮亮

馮亮字執夫。金華人。嘉靖壬辰進士。授丹徒知縣。縣當孔道。疲於供億。亮務裁節。以裕民。什汰其六七歲。

以庫積贖鍰代輸白糧當道難之亮持之力竟得請擢兵科給事中轉都給事疏奏清軍理餉建城堡浚濠塹數事悉見施行又嘗劾宦官高隆成國公朱希忠怙寵肆橫一時權貴斂迹尋陞河南叅政會歲大祲民相食亮捐俸賑饑爲首倡民賴全活以治行卓異擢四川按察司使風裁凜然貪墨懾服以疾乞歸至夔州卒年四十四夔守爲視殮解其囊止四十餘金其清介如此有疏稿一卷

鄭道

鄭弘道字克修蘭谿人性至孝七歲侍親疾治湯藥

衣不解帶、登萬曆甲戌進士、授徽州推官、讞鞫明允、郡無冤民、有士人投謁門下、以石硯爲贄、發之則金也、却而絕之、攝郡篆、羨餘數千金、不取、令造紫陽橋、人稱曰鄭公橋、又攝休歙二縣、贖鍰數萬、悉以葺泮宮、資貧士、餘以置義塚、調南雄、去之日、士民扳號數百里、南雄西隣豫章、兩粵商賈於庾關、權稅賦額、屢虧、弘道悉清其弊、不一月、正賦以足、二年卒、徽人祀之名宦、

郭時斗

郭時斗、字文起、蘭谿人、以恩選授清遠知縣、邑兼鹽

務靖江王諸役恣橫。每一引挾百餘引。莫敢問。時斗以王舟停西岸。以東舟遞運至西。如數而止。中貴及私牙不得售其奸。攝新會。民賦多逋。邑有防海兵糧。時斗不論銀錢。粟帛牲畜器物。平價收之。隨兵所欲。平價給兵。民皆便之。爲權要所中。左遷兩淮權鹽使者。幕官解期迫。而稅銀不至。檄時斗督催。時斗列貧商富商。頌商立限之稅。乃齊。擢潯州府推官。多所平反。粵西多盜。武弁冒功。縛平民二十四人爲盜。制府梟其二。斃於獄者四。餘十八人。發潯州。時斗白其枉。而釋之。五指山盜。芾公廩連諸洞入寇。時斗乃募忠

勇授計破賊之女官秦氏抗不奉命時斗以計生致
之後知高唐值歲旱躬至鄉計口而戶賑之民賴以
活尋以病乞休百姓遮留不得與范公同尸祝焉

程正誼

程正誼字叔明永康人隆慶辛未進士調武昌司理
癸未分臬雲南時土司車里八百老撾等負固正誼
至開誠布公感諭悅服乙酉廷議勦羅雄州中丞以
誼才越境委誼佐理拔羅雄升廣西參政晉河南憲
長時兩河大祲饑民黃江等行掠誼策賑兼撫乃歸
命乙酉升山東右藩轉四川左藩時土官方有亂萌

誼徧訪諸隘爲之圖係以說未幾楊應龍反播州總督李化龍議撫正誼曰此長其驕耳乃出圖說請勦化龍喜曰不虞今日復見卧龍及奏凱化龍䟽正誼功升順天府尹赴京以蜀扇不工罰及僚屬誼引罪請寬僚屬遂歸與同志講學五峯書院壽八十餘所著有展華堂集

黃卷

黃卷字惺吾永康人萬曆丁丑進士以中書舍人選河南道御史遇事敢言巡鹽長蘆請建學滄洲以處鹽商弟子巡按山東訪求周公後面復其家癸巳國

本未定下三王並封詔、建言諸臣皆以忤旨削籍、卷抗疏、與回天、聽直聲、振朝廷、疏留中、叔歸、光宗登極、詔起用、卷已歿、所著有四書五經發微、子一鵬、官濟南同知、明季閤門殉難、人稱父子濟美云、

倪尚忠

倪尚忠字世卿、浦江人、萬曆戊戌進士、授廣東順德令、誠心愛民、不務督責、邑多盜、大辟以下、恒薄懲、或以爲言、曰、使其能改、何過督爲、著宣化錄以勸率之、順德下邑、科第素寡、尚忠日進諸生督課之、嗣是甲第日多、躋顯仕、前後得二宗伯、人比之文翁、萬曆中

設採珠廠、闢使恣橫、民多破家、尙忠下令、邑中有珠
廠、鈎役、杖而禁之、有以採珠事累及孝廉者、執而置
之獄、閹怒、禍且不測、尙忠無懼、力言制按兩院、得奏、
罷採、遷吉州府同知、以母老致仕歸、尙忠博學工詩
文、所著有居雲草、鳴籟草、宣化錄、學製編、年八十終
於家、祀廣東名宦、子仁禎、以進士官禮科給事中、女
仁吉、以節婦受旌、才藝精絕、